

## Usafi

*Mtu awaye yote asiudharau ujana wako, bali uwe kielelezo kwao waaminio, katika usemi na mwenendo, na katika upendo na imani na usafi—1 Timotheo 4:12.*

**K**wa kumpokea Yesu kuwa Mwokozi wake binafsi, mwanadamu analetwa katika uhusiano wa karibu na Mungu na kupata fadhila Zake maalum kama ilivyo kwa Mwanawe mpendwa. Anaheshimiwa na kutukuzwa na ameshirikiana kwa karibu na Mungu, maisha yake yakiwa yamefichwa pamoja na Kristo ndani ya Mungu. Huu ni upendo wa pekee, upendo wa ajabu kabisa!

Hili ni fundisho langu la usafi wa kimaadili. Kuweka hadharani weusi wa uchafu wa dhambi za watu hakutakuwa na manufaa hata nusu katika kung'oa dhambi kama ambavyo ingekuwa kwa uwasilishaji wa mada hizi kuu na za kuadilisha.... Ni Biblia na Biblia pekee ambayo imetoa mafundisho ya kweli juu ya usafi. Basi lihubiri Neno.

Hiyo ni neema ya Mungu, huo ndiyo upendo ambao kwa huo Alitupenda, hata tulipokuwa wafu kwa sababu ya makosa na dhambi, maadui akilini mwetu kwa matendo maovu, tukitumikia tamaa na anasa mbalimbali, watumwa wa uchu wa chakula na mihemko idhoofishayo, watumwa wa dhambi na wa Shetani. Ni upendo mkuu jinsi gani umeoneshwa katika Kristo, Anapokuwa upatanisho kwa ajili ya dhambi zetu. Kupitia kwa usaidizi wa Roho Mtakatifu nafsi zinaongozwa kuomba msamaha wa dhambi.

Usafi na utakatifu wa maisha ya Yesu kama ambavyo umewasilishwa kutoka kwenye Neno la Mungu una nguvu zaidi ya kurekebisha na kubadilisha tabia kuliko zinavyoweza kufanya juhudi zote zinazowekwa katika kusimulia dhambi na makosa ya wanadamu na matokeo yake halisi. Kumtazama kwa uaminifu Mwokozi aliyeinuliwa msalabani hata mara moja kutafanya zaidi katika kuisafisha akili na moyo mbali na kila unajisi kuliko ambavyo maelezo yote ya kisayansi kutoka kwa msemaji madhubuti yanguweza kufanya.

Mbele ya msalaba mwenye dhambi anaona kutofautiana kwa tabia yake na Yesu. Anaona matokeo ya kutisha ya uasi; anaichukia dhambi ambayo ameitenda na kisha anamshikilia Yesu kwa imani iliyo hai. Ameihukumu hali yake ya uchafu katika nuru ya kuwepo kwa Mungu na weledi wa mbinguni. Ameiangalia kwa kiwango cha msalaba. Ameipima katika mizani ya patakatifu. Usafi wa Yesu umemfunulia uchafu wake mwenyewe katika rangi zake mbaya. Anageuka kutoka kwenye dhambi inajisiyo; anamwangalia Yesu na kuishi.

Anapata tabia ishughulishayo, iamrishayo na ivutiayo kwa Yesu Kristo, Yeye ambaye alikufa ili kumwokoza kutoka kwenye ulemavu wa dhambi na kwa midomo tetemekayo na kwa machozi hutangaza "Asingekufa bure kwa ajili yangu." "Na unyenyekevu wako umenikuza" (*Letter 102, 1894*).

Kama ngao dhidi ya majaribu na kuvutiwa kwa usafi na ukweli, hakuna mvuto mwingine unaoweza kuwa sawa na hisia ya kuwepo kwa Mungu  
(Eliya, mara ya 30).